

Na današnji dan rođen Hasan Kikić



(1905. – 1942.)

Hasan Kikić, književnik i revolucionar

Svoj život i književno djelo posvetio je bosanskom čovjeku iz čijih je redova i sam ponikao, pa ga vrlo često nazivaju i socijalnim piscem.

Hasan Kikić, književnik i revolucionar, rođen je 20.08.1905. godine u Gradačcu u brojnoj i siromašnoj porodici. Kikić je u 37. godini u redovima partizana ubijen na planini Čemernici, 6. maja 1942. godine.

"Ponosan sam što sam imao takvog brata, takvog književnika i borca za prava socijalno obespravljenih. Bio je vrlo strog, ali pravedan. Imao je veliku strast za pisanjem" - prisjeća se Mustafa Kikić, brat Hasana Kikića.

Biografija

Rođen u osiromašenoj begovskoj porodici, kao jedan od sedam sinova roditelja Hase i Munire (rođene Đulbegović). Učiteljsku školu je pohađao u [Derventi](#) i [Zagrebu](#) i radio kao učitelj u [Pašinom Konaku](#) ([Hajderovići](#)) u okolini [Zavidovića](#), [Rogatici](#), [Gornjem Sjeničaju](#) u okolini [Vrginmosta](#) i [Pisarovini](#) u [Hrvatskoj](#). Pravni fakultet pohađao i završio u [Beogradu](#).

1937. godine zajedno sa Skenderom Kulenovićem i Safetom Krupićem u Zagrebu pokrenuo bošnjački časopis *Putokaz*. Sa početkom [Drugog svjetskog rata](#) odlazi u partizane u februaru 1942. godine, a kao komesar bataljona gine 6. maja 1942. godine.

Hasan Kikić je priznati bosanskohercegovački književnik, pisac poezije i proze.

Najbolja Kikićeva djela su "Provincija u pozadini", "Ho-ruk" i "Bukve". Za "Provinciju u pozadini" književnici kažu da predstavlja dokument o djetinjstvu pisca i njegovih vršnjaka, o teškim godinama Prvog svjetskog rata. Prve književne radove počeo je objavljivati 1926. godine, najprije prozni rad "Iz zapisa jednog alkoholičara", a potom pjesmu "Pjesma bolesne djevojke", koja je objavljena u časopisu "Vijenac".

Naziv 'Hasan Kikić' je nosila Nagrada za prosvjetne radnike u Socijalističkoj Republici Bosni i Hercegovini.

Nekoliko škola u Bosni i Hercegovini je nosilo ili još uvijek nosi njegovo ime.